

KENYATAAN MEDIA



KEMENTERIAN PERDAGANGAN DALAM NEGERI DAN HAL EHWAL PENGGUNA
No. 13 Persiaran Perdana, Presint 2,
62623 Putrajaya
No. Telefon : 03-8882 5562
No. Fax : 03-8882 5569

AWAS BAHAYA KEBAKARAN DI STESEN PETROLEUM

PULAU PINANG, 13 JULAI 2019 - Program Kesedaran Keselamatan Petroleum ini merupakan inisiatif Kementerian Perdagangan Dalam Negeri dan Hal Ehwal Pengguna (KPDNHEP) bagi meningkatkan kesedaran pengguna terhadap kaedah pengendalian bahan-bahan petroleum contohnya petrol, diesel dan gas memasak (LPG) yang betul dan selamat sama ada di stesen minyak, premis perniagaan mahupun di kawasan kediaman.

Kempen kesedaran ini dilaksanakan kerana masih ramai pengguna dan pengendali yang tidak peka dan cuai terhadap keselamatan diri serta orang di sekelilingnya. Di antara kelakuan tidak selamat yang masih dikesan ialah **penggunaan telefon bimbit** serta **tidak mematikan enjin kenderaan semasa pengisian minyak**.

Perlakuan seperti ini sebenarnya amat bahaya kerana akan menjadi pemangkin berlakunya letupan dan kebakaran yang besar. Kita boleh mengambil iktibar dari beberapa kes kebakaran di stesen minyak yang berlaku pada tahun-tahun yang lepas. Aktiviti merokok di persekitaran stesen minyak juga didapati masih berleluasa ketika mengisi minyak di stesen.

Berdasarkan **kepada Peraturan-Peraturan Kawalan Hasil Tembakau 2004**, Peraturan 11(1)(o) yang menyatakan bahawa ***"tiada seorang pun boleh merokok di mana-mana kawasan di dalam suatu stesen minyak"***, termasuklah di tandas, kaki lima dan *backyard* stesen. Sekiranya pengguna melanggar peraturan ini, mereka boleh dikompauan sehingga RM5,000.00, dan jika sabit kesalahan, boleh didenda tidak melebihi RM10,000.00 atau dipenjarakan sehingga dua (2) tahun.

Larangan ini perlu dikuatkuasakan dengan lebih tegas oleh para pengusaha stesen minyak khususnya dengan kerjasama Kementerian Kesihatan Malaysia bagi menjamin kesihatan serta keselamatan nyawa dan harta pengguna termasuk petugas stesen.

Selain usaha-usaha yang dijalankan oleh KPDNHEP dan syarikat-syarikat minyak untuk mewujudkan kesedaran keselamatan di pihak pengguna, pihak pengusaha stesen minyak juga perlu sentiasa memastikan **peralatan dan keadaan premis perniagaan mencapai standard keselamatan yang ditetapkan**.

Pengusaha stesen minyak di saran agar sentiasa memberi penekanan terhadap aspek keselamatan di stesen minyak masing-masing dengan menyediakan ciri-ciri keselamatan seperti CCTV, kawalan keselamatan, sistem pencegahan kebakaran aktif dan pasif, serta papan tanda amaran keselamatan yang lengkap, mudah dilihat, serta jelas untuk

panduan pelanggan serta perlu **diberi latihan berkaitan keselamatan kepada kakitangan** seperti kaedah penggunaan alat pemadam api dan butang berhenti automatik yang telah disediakan di semua pam jika berlakunya kebocoran.

Untuk LPG atau lebih dikenali sebagai tong gas, penjual gas memasak LPG boleh dari semasa ke semasa membantu mengingatkan dan membantu para pembeli untuk **memeriksa kelengkapan dapur memasak seperti hos dan alat pengatur gas bagi memastikan tiada kebocoran gas** yang boleh mengakibatkan kebakaran.

Inisiatif ini adalah sangat baik bagi memastikan pengguna dapat mengisi minyak dengan keadaan yang cukup terang dan dijamin keselamatannya. Pengguna yang memerlukan bantuan pihak Polis atau apa-apa perkhidmatan kecemasan yang lain juga boleh mendapatkan bantuan di stesen-stesen BH Petrol di seluruh Malaysia di mana pengusaha dan kakitangan stesen telah dilatih untuk berhadapan dengan situasi-situasi kecemasan.